


東溪集
五

卷五



東溪集卷之九目錄

疏

辭全羅監司疏

乞繼後疏

辭刑曹參議疏

請建潛谷書院疏

因五冠德津祀典變通論可否疏

啓辭

請推考刑曹堂上啓

請拿問前金川郡守黃道光啓

請推考黃海監司啓

處置兩司啓

請推考承旨啓

請遠竄內侍金鉉啓

論吏曹叅議李畬避嫌

啓

就職後再避啓

請遞吏曹叅議李畬啓

請申飭西銓啓

處置同僚啓

特遞還收後就職避嫌啓

拜持平避嫌啓

因李玄祚䟽避嫌啓

因李之翼事與同僚聯名啓

請罷金堤郡守尹彙善啓

請從權制合司啓

請拿問許彬啓

請拿金德遠事避嫌啓

因李翊相事避嫌啓
因金鎮龜䟽避嫌啓

卷之四

東溪集卷之九

疏

辭全羅監司疏

己卯五月

伏以無狀小臣累叨匪據報效蔑如疵釁徒積循省
愧懼分甘廢捐湖藩新命遽下於千萬夢寐之外
臣誠驚惶震惕罔知置身之所也夫藩臬之職責任
甚大上焉以奉承聖化中焉以糾率列邑下焉以
惠懷小民財賦之綜理戎兵之充詰皆所管轄得其
人而任之則一方蒙其福不得其人而畀之則一方
受其害況此湖南地方最廣民物最多事務最殷

國家之所恃以為根本而從前簡授最重於諸路苟
非其人則不但為一方之受害而已如臣空疎淺薄
百無一能尋常職事動輒顛蹶顧此重任尚何望策
駑礪鈍能有以稱塞其萬一哉且臣之情勢又有萬
萬不安者臣於前歲名登臺章殆決數朔被人詆罵
無所不至既往之事橫逆之來臣固不敢更為提起
重煩天聽而至於洪受瀝再避之辭以為臣嘗言
未嘗參涉李翔事云噫臣於李翔事若疏若
已登徹聖明之所俯悉國人之所共見此不但參
涉而已臣雖欲巧諱三尺童子亦無信聽之理未知

受憲何從而得此說也雖然受憲曰臣有是言臣則
曰臣無是言此亦清朝士夫之著恥事也在臣之道
惟當緘口無辨自訟自咎而已既不敢呶呶索言以
惹紛鬧亦何敢揚揚顯列以增嗤點乎我揣量才分
反顧情勢俱無承當新命之望伏乞天地父母
俯察臣肝膈之懇並命鑄改臣新授職名俾朝
家無濫授之譏愚臣亦得以粗安賤分其於公私不
勝萬幸

乞繼後疏

全幸

伏以臣之於君猶子之於父也子有疾痛必呼父母

人情之所不已者今臣情事不翅疾痛之在身安得
不冒萬死哀籲於 父母仁愛之下乎臣賦命奇薄
生二男未及十歲並皆夭死臣妻宿病在身斷產已
過十餘年臣年迫五十尚無嗣息臣母年今八十五
歲哀憐臣無子使之早定繼後而臣從兄故縣監臣
泰延適有三子故臣請於從嫂李氏願以其季子弼
抗為臣繼子臣之一家諸議皆無異同以為允合蓋
同堂至親無異親兄弟兄弟之子相為後禮律親理
實為當然故也然而婦人之情不能捨其所愛遷延
數載終靳決許臣母以此為念每謂臣曰吾見汝立

後而死則瞑目無憾為之流涕臣無子不孝以貽老
母之憂念門祿祚薄至親間男子甚少苟捨弔抗他
無可為子者深恐徃時月人事難期有所差失終
不能奉承老母之至情則不孝之罪於是乎益大矣
且臣於率前荐遭家禍伯兄長侄相繼喪亡臣與老
母零丁相依今者猥蒙天恩受任藩方勢將將母
赴任而或當奔走之時則將護老母更無他人臣之
情勢益復窮急矣仍竊伏念故叅議臣金萬吉曾以
其繼後事上章陳乞特蒙矜許死而為不餒之鬼
繼絕之恩無不感歎今臣情事適與萬吉相似而

理勢之急實有加焉極知區區私悃仰瀆嚴聽猥
越之罪無所逃死既有近例之可援不敢自阻於
仁覆之下干冒威尊畢暴情理伏乞天地父母
曲垂矜憐特令該曹有以許施則臣之母子頂戴拱
祝窮天極地靡所仰報矣臣無任瞻天震越惶悚懇
祈之至

初名弼抗而後
以弼休改之

辭刑曹叅議疏

庚辰三月

伏以臣冥行世路處身昧方絳羅文網罪名狼籍跡
滯牢狴魂飛湯火幸賴日月之光回照於戴盆之
下雷雨之澤荐及於畫地之中薄罰不加寵秩仍存

臣出自圓門歸對老母感祝 天恩一涕一血而已
不料今者秋曹佐貳之 命忽及於屏伏之際驚震
震惕靡所容措顧念分義之重 恩數之深惟當竭
蹶趨謝他不暇計而第向者臺章之所以搆臣者非
尋常規警之化實近來搢紳間所未有之事屑瑣鄙
穢聽者掩目若使戰國之士而遭此則其不待辭之
畢而自刎而死者亦已明矣臣誠洪認既不免逐条
自辨於爰辭而該府議奏終塵 睿照則今不敢更
為覲縷以取煩瀆之罪然臣之被詢顛末亦有不可
不略暴者蓋臣受任南臬未及赴任之前以臣曾任

海邑時事一種無根之說流行於搢紳間臣固默識其情節而付之一笑矣及至辭陛之後添做紙厘人相約之說自唱自和互相傳播又復粧撰南漢時賑資貸出之事抵掌鼓頰無所不至終至騰諸臺章上達天聽而心知其事皆孟浪卒歸無實故以不可不查辨等語插入末梢有若故為臣申白之地者然其經營閃弄必欲陷臣之狀誠可謂巧密亦可謂周備矣雖然使臣果能工於諛身嫻於涉世無觸忤勢家酷招仇怨之事則清朝臺閣之臣何至於為臣一人費心用機若是其勤勞乎皆臣自取何暇尤

人且伊時驗臣罪犯者凡有三處而皆非阿護賤臣
自犯於附下罔上之罪者即通朝之所悉也窮查極
覈竟無事狀不得不據實狀聞如令當初論臣者只
憑風聞而果出於公心則亦可以釋然矣猶復張皇
投疏以其不成說之辭強飾所未有之事必欲置之
於曖昧之地而後已噫亦甚矣 聖明在上公議在
下臣雖褊狹亦不欲與之爭辨重傷事體也臣過蒙
鴻造忝竊清顯歷敷內外亦已多矣雖無寸長能
塞職責而庶幾當官盡心隨事自飭以為一分報答
之地矣立朝以來前後跋扈非止一二而亦不料若

此污蠱之名卒然來加也此無非臣之不能早辭
寵祿低徊榮途自罹危機之致今雖欲收攝悸魂洒
濯累踪奉承 恩命而險塗難盡脆骨易瘳若使賊
機更發罪罟愈密則雖 天地至仁父母止慈曲垂
哀憐更欲寬貸有不可得者矣螻蟻死生固不足言
而其玷 朝廷之名器辱 聖主之任使為如何哉
此誠臣之所大懇也伏乞 聖明察臣危苦之忱特
許鑄削臣職名俾臣得以屏居省儉言粗安賤分實
是終始生成之惠也情溢辭慙言不知裁臣無任竦
慄危迫涕泣祈懇之至

請建潛谷書院疏

代加平儒生作

伏以我國家崇賢右文之化迥越千古儒賢之卓然
名世可為宗師者既已循士林公共之論次第殿食
於文廟矣其外雖一節之人獨善之士樹立操守
有可以砥礪世俗裨補風教者必崇獎而優異之許
多士俎豆之請者前後不可勝記至于我殿下尤
致勤焉其所以脩舉廢典贊勸來許者意甚盛也今
有窮焉而益致其養達焉而能濟其施名重於士林
澤流於民庶其成就蔚然無愧於逞督詰人而尚無
專享之祠崇奉之典有所未盡則豈不為士林之所

番而昭代之欠事也耶臣等竊伏聞故領議政文
貞公臣金墳天姿穎異篤實世能儒素之風家傳詩
禮之訓多從曹好益受業好益即頌南儒士之有學
行者也稍長又請教於先正臣文簡公成渾之門亟
蒙獎許其淵源之來蓋如是矣季未弱冠蔭羅竇褐
流離遷徙家道窮匱而送死則有三哀負土之誠養
生則有仲由負米之勤孝行之篤有足以感動神明
其所以為根本田地者蓋如是矣既而士論乖張邪
說肆行文簡公臣成渾被誣於時則輒倡率多士手
疏而直其枉賊臣仁弘醜詆先正臣文純公李滉及

文元公李彥迪則又削仁弘儒籍雖奸黨方熾禍機
不測而有不暇也及至曩倫既歿世道益壞則遂自
屏於加平郡西潛谷村其所號潛谷即此地也地在
窮峽所與居者木石麋鹿而已所與伴者牧豎田氓
而已樵於谷畊於山躬親賤事僅以自給雖顏回之
陋巷原憲之蓬堵殆不侑於此能處之晏然而鉏耰
之隙講讀益勤每夜爇松明照卷咿唔不輟而尤好
中庸書沉潛課誦未嘗釋手見之者若梁鴻龐德公
無意於世將以終身而乃其抱負既大自期甚遠其
於經國之猷濟民之術亦證古酌今講劄明熟蓋將

待時而出措諸事業其所為學固非山人處士獨善其身而徒為紙上空言之化也洎乎仁祖反正世道清明則首膺遺逸之薦旋擢大庭之魁立朝以來自縣邑而至公孤惓惓惟以民憂國計為心前後封章反復不已苟可以裕國而便民衆嘲羣誅莫之顧也卒以均役之訟先試湖西而兩南之民次茅蒙國家若保之惠先正臣文正公金尚憲嘗為文曰伯厚自多至老凡所歷踐皆以慈祥著聞其被不忍心之德者多矣伯厚之心愈久而愈不衰豈非誠實仁人君子也伯厚即堉之字也斯言可謂盡其終始矣

若其敦睦親族無間踈遠清簡儉約不改終始誘掖
後學至誠不怠此其一行一事而即薦紳章甫之至
今誦歎者也臣等俱以末學蒙無知識而所居之郡
即墳肥遯之地也遺墟宛然田翁野老之所指點而
稱道者既足以興起感慕有倍於他人況本郡山深
峽僻風俗推鈍自晉無文儒絃誦之習矣自墳遯居
以來俗尚漸漬挾筴誦讀始知詩禮之可學者壘將
百季信乎君子之澤及人者遠也然則其欲崇報而
揭虔者當如何哉一邑之名為儒士者莫不不謀同
辭相議建祠於所謂潛谷舊墟以寓景行之意而竊

伏聞近者朝令書院之設必先請於朝廷而後方許營建茲敢累足上來仰籲於宸嚴之下伏乞聖明俯察多士之請出於忱誠亟命有司即許立祠俾窮巷末學有所型範而興起則不但為聖朝崇報賢臣者更無餘憾而已臣等無任激切屏營祈懇之至

因五冠德津祀典變通論可否疏

任長湍時不呈

伏以五冠山德津堂二處並在臣所管境內每當祭官下來之時厨傳之事及京司下輩不無憑藉索賂之端其為邑弊誠有如重臣所達者然茲二處蓋自

麗朝載於祀典入我朝仍之一率三祭而香祝自
京下來祈禱則必差重臣祝辭並有國王謹遣語
其禮之重且敬若是也是故當久旱之時各自郡邑
祈禱也必祭於他山川而不敢設行於此二處者禮
固然矣今因些小弊端王城相望之地累世虔
祀之所一朝委之於水道本邑則臣未知於禮意何
如也將事之功無乃有僭乎奉神之禮無乃近慢乎
周制王畿之外乃為諸侯之地諸侯之得祭其封內
山川者不在於王畿之內漢唐以來無不皆然閔旱
之時如不徧走羣望則已畿內名山大川之祭不可

委之於藩臣者亦已明矣 國家祀典之成 聖祖
賢臣相與參定並有意例傳之數百季遵奉罔違雖
或有一二可疑者恐非一禮官之所可率爾建白容
易變通者也國之大事在祀與戎祀典之失非細故
也詩云民之失道乾餱以愆事神之道何以異此今
既委之本道事體遂輕終必至於官吏怠棄神不顧
歆此殊不可不念也伏乞 聖明更令禮官詳議於
廟堂諸臣博考典禮商確可否在所必改則改之可
以仍舊則仍之要令祀典歸於至當不勝幸甚臣待
罪本邑見祀典之變舊適有賤慮不敢自隱踰越私

分干冒 威尊無任恐懼悚慄竢罪之至

啓辭

請推考刑曹堂上啓

戊辰五月

天下之惡莫大於誣告誣告者既被其律則脅使誣告者決無獨免之理西原罪人順立獄事既已反案金先以誣告被全家之律而金瓚等以脅制誣告之人終無論罪之舉莫重綱常之獄有此踈漏之事請刑曹當該堂上推考金瓚等仍令該曹明白取招依律科罪

請拿問前金川郡黃道光啓

全奉六月

前金川郡守黃道光曾在任所變為文簿私用勅需其數不訾掌守吏胥皆已吐款於新官道光乃以諺書乞哀自請還納其他鄙瑣之事不可殫舉而托以修改鄉校斂錢於校儒反實其私橐校儒輩至有呈官推出之舉其犯贓文書皆在於本官西來之人多有目見而傳說者如此貪污之人不可不依法痛懲請前金川郡守黃道光拿問定罪

請推考黃海監司啓

今日

黜陟不嚴為近來痼弊前金川郡守黃道光貪污不洽之狀人莫不知而其時監司連置上考已極無謂

任滿之後至有請留之 啓事之寒心莫此為甚請
當該監司從重推考

處置兩司啓

全季 六月

並引嫌而退意在偏護力詆言者毋論他事不可仍
在峻發之論理宜力爭意外侵斥何必為嫌言有指
摘法當相避不敢處置其勢固然請大司憲宋奎瀾
通差執義沈枰掌令南弼星持平金洪福行大司諫
申琬並命出仕

請推考承旨啓

全季 全月

凡臺彈准請後必以末梢蒙允之 啓奉傳旨者蓋

其措語加減輕重之間成命在是故也非政院所
當任意取舍明矣前公州牧使趙泰期罷職傳旨
及前金川郡守黃道光拿問傳旨政院皆以初
啓措語書入事體未安且關後弊不可無規警之道
請當該承旨推考

請速竄內侍金鉉啓

金季

國家之防制宦寺極其嚴截祖宗朝慮患之意深
且遠矣內侍金鉉憑恃任使之恩濟其貪婪之慾
蠹竊公私多積年所廣占膏壤大起甲第居處服飾
僭越無度縱遣宮差多奪民田操縱在意恐譴歸國

窮民呼訴前後相續中外之憤惋固已久矣乃於上
季都下饑困之日潛囑勲貴公府百餘石之米減價
貸出詭稱宮中需用之資實賭中間轉販之贏其冒
禁防而通姦利之狀亦已敗露如此之類若不隨現
懲治不但有累於清朝之政將啓日後無窮之弊
請內侍金鉉遠竄

論吏曹叅議李奮避嫌啓

全季

叅下蔭官非生進則必考講後陞出六品例也近來
此法尤極申嚴而吏曹叅議李奮頃於獨攸之日為
其兄水庫別檢李蕃大故之前不待考講徑先送西

冒陞六品此曾所未有之事也其不能遠嫌疑而謹
法式甚矣物情舉以為駭故臣於朝者果發請罷之
論矣即伏見獻納南致熏引避之辭臣不勝瞿然繼
之以訝惑焉竊學蔭官之除考講陞遷之例臣之寡
聞固所未諳而招問銓曹之吏則亦以為病見同僚
所謂非舍病開云者臣實未曉也設令果有謬例之
可指在他人尚不可因循冒濫況於兄弟之親乎此
而置之則其流之弊將至 國家令格一任銓官之
隨意壞矣而莫之問矣論以罷職未見其過重也且
人之所見各自不同同僚誠以罷職為過則更為消

詳務歸至當乃是臺體之應然而今乃見其簡問未
有一言之往復而猝然起鬧似此事創臣亦未之前
聞也無非如臣無狀忝在臺端見輕於同僚之致何
敢一刻抗顏仍冒乎請 命遽斥臣職

就職後再避啓

全拜

無狀小臣忝叨言職欲論微事橫惹鬧端喧瀆於
侍藥之日罪戾至深無所自逭千萬意外處置請出
召牌繼臨不敢違通祇詣臺地而第臣又有不敢
自安者蓋臣初聞物論譁然以為銓官之不顧親嫌
除講送西未有前例云而傳說之言慮或有差招來

該曹執吏再三盤問則以為本曹果無其例渠所劾
見其言不翹明白故臣於日昨據此陳列矣退聞數
三率前有一別檢冒陞與李蕃事相同者更招該吏
使之廣搜文簿則果如其說此固稀罕之謬例為飲
官者決不當為其親屬罷用於數率之後以廢成格
論其所犯雖或與初開者有間強引謬例之罪亦自
不輕臣之避辭固已各折言之而第其曾所未有初
見等語雖憑該吏口狀抑未免有不審之失何可仍
冒於職次乎請 命逮斥臣職

請逮吏曹叅議李會啓

全日

叅下蔭官非生進則必考講後陞出六品例也近來
此法尤極申嚴而吏曹叅議李畬頃於獨政之日為
其兄水庫別檢李蕃強引課例不待考講徑先送西
冒陞六品其不能遠嫌疑而謹格式甚矣物情舉以
為駭請吏曹叅議李畬通差前別檢李蕃而授六品
改正上命推考翌日錯之化更無勘問之事十四字刪添此非尋常啟物情舉以為

駭六字

請申飭西銓啓全日

叅下蔭官之考講後陞遷非但舊典之所載亦有新
令之申嚴則均一施行無或異同可也東銓之不待

考講徑先送西固是犯科之甚而至於西銓則無明白定式之事故多有不經吏曹考講而直陞司果之類既往之事雖不可一一釐正請自今以後亦為申飭西銓俾無冒陞之弊

處置同僚啓

全季
全月

並引嫌而退吳道一使酒多忤固有其失矣頃在公廳對鄭澔譏侮其昆弟之狀臣亦目覩然以酒招謗實是古來所稱名公之所不免者當其時隨聞警責未為不可乃於既久之後指小成大以無為有摭摭敷演欲置削版之科者已極無據而至於廣置爪牙

專事欺蔽氣勢所壓滿朝媿妬等語實是權奸巨慝之罪目使道一誠有近於是者則流竄誅殛未或為過而猶以削版為律何哉輕擬其律重擠其罪者實是從古壬人之手段其媚嫉構陷之狀昭然難掩不可仍置言議之地法當相避言有嫌礙不敢可否其勢誠然媚嫉之言俱出虛捏據實爭辨是乃臺體請正言鄭澔違差獻納洪受憲司諫徐文裕行大司諫申琬並命出仕

特遞還收後就職避嫌

啓
全季

臣於日昨伏聞 聖上威怒震疊譴罰嚴重道路惶

惑朝著危怖此實 聖朝無前之過舉敢與諸僚相
率請對欲效匡救之忱而言辭拙澁不敢勦挽未及
開口之前遽承逋斥之 音不匡之刑臣實為首第
念 國家之置臺閣蓋欲其隨事力爭以正闕失如
臣罷軟雖得極意盡言固不足有概於 聖心而
殿下既已畀之以言職則決不當不待出言先加摧
抑只使隨衆進退而已雖 殿下熟知臣駕下以為
不聞渠言已悉其意而其於待言者之道亦已不弘
矣無非如臣無狀忝叨臺地上以貽累於 聖德下
以虧損於臺風覲面悼心無地自容千萬夢寐之外

特蒙牽復之恩仍覩召牌之臨感激恩私嚴
畏分義不得不黽勉趨承而顧此負罪之深既在難
賞之科已過之人尤無還冒之理其不可一刻抗顏
於臺次也決矣請命鑄斥臣職

拜持平避嫌啓

全奉

臣以已試債敗之人理難復忝於言議之地適叨新
命於鞠事方張之日不敢違牌黽勉出肅而第本
府有當該承旨請遞之啓三司之一時遞罷無一
言匡救亦在其臚列中臣亦伊時特遞中一人也既
不敢參涉於其論則所當登時自劾而昨者詣臺日

已昏黑倉卒之間未及審察泯默還出經宿之後始
乃引避臣之罪悔至此尤大何敢一刻晏然於臺端
乎請命通斥臣職

因李玄祚疏避嫌啓全季

臣即伏見正言李玄祚疏譏切兩司不遺餘力而其
詆斥向日請對諸臣語尤深峻一則曰畏恟天威
一則曰倉卒恒撓臣不勝慚悚瞿然也臣於伊時與
兩司多官請對也非不無先為陳啓之議而事出
急遽奏對之語倘忘之旨俱未及詳聞意謂既登
前席先請罪名反復開陳而後乃陳啓事理當

然矣不料天怒遽震如臣拙訥者未及開口先
賜遮斥今若以不能如古人之牽裾折檻爭死職下
為咎則固無所辭而乃以全昧緩急遂成過舉駁之
於恒惴之科此非臣意慮之所及也蓋玄祚之意以
為臺啓既發則喉司之臣可以據例不捧傳旨而
聖朝過舉猶未成也籍令其時先發還收之啓
欲以此分喉司之力緩兩臣之行則猶或可也俞
音未下之前則過舉猶在烏論其成不成哉此又臣
之所未曉也至於銓長特遮還收之請兩司之閱月
苦爭者蓋以禮召之臣一言不概遽加譴遮其為

殿下之闕失無大於此故耳何嘗以職名有無為
有關於山野之人而然哉乃敢譏之以應文斥之以
激議沮撓重論無復顧藉實未知其言之專出於念
國故之公心也如臣無似忝叨臺憲上未能回天下
徒招物議不免喧聒於侍藥之日臣罪萬死决不
可一刻仍躡於職次請命遞斥臣職

因李之翼事與同僚聯名啓

全奉
全奉

朝者長官以全羅監司李之翼論遞事發簡而觀其
措語蓋欲追劾之翼在臺職時避嫌事及除北臬時
辭䟽語也茲二事誠有之矣之翼之以此被劾不為

不多矣坐此廢錮不為不久矣今者以列卿降授外
藩其在 朝家滌瑕蕩垢之道未為不可而乃復提
起十季前事拈出未徹疏語輒欲彈論者不免為已
甚之歸故以此意答送矣長官堅守已見終至引避
無非臣等無似忝居僚席言不見信之致何可仍冒
於職次乎請 命遞斥臣等之職

請罷金堤郡守尹彙善啓

全奉
全月

金堤郡守尹彙善性耽麴蘖醒日無多 除授本職
之初大臣至以此咎責政官而終乃恬然冒赴其冒
沒廉隅已不可言及其到任之後日飲無何大小政

令多出醉酖之事不但刑罰顛妄民不堪命至於頃夏影頓陪來之時身為差倘之官醉不成樣至使他官代行如此之人不可仍置字牧之任請金堤郡守尹彙善罷職

請從權制合司啓

九月

臣等以勉勸從權制事竭誠號籲而天聽邈然未有允許之意臣等竊不勝遑遑煎迫之至臣等亦豈不知殿下之至情而為此強聒之言哉只是據列聖已行之例循舉國同然之情有此萬不獲已之請殿下輒以為不忍聞而至下毋庸更煩之

教耶夫居喜而有艸木之滋與有疾服藥等耳苟是
孝子之所不忍聞者則聖人胡為而著之經傳訓後
世耶今 殿下以身無疾患食飲無減欲堅守常制
不思權變嗚呼 殿下果以此為可恃耶半歲焦憂
之餘遽罹巨創累日失擗之中強進飢粥危敗之症
勢所必臻而特救於至情未之深察耳夫因憂致疾
非如外感榮衛之比與居飲啖不覺大異於前而真
元腸胃自致暗鑠於中一日二日漸就漸藹及其疾
作之後則雖有和扁亦無以施其技矣臣等思之至
此不覺心骨凜然伏願輒聖經滅性之戒念 祖宗

付畀之重亟從權制以副羣下之望

請拿問許彬啓

全奉

臣等伏見花梁僉使許彬疏啟因新山擇兆之事更為遷動先陵之議臣等不勝駭然之至夫先陵寢事體至嚴且重況於前歲大臣諸宰再次奉審之後殿下亦且親審斷自聖衷遂寢遷奉之計而渠以么麼一士雖有膚淺之見固不敢有所輕議而至以仍奉欠缺之地為聖德之一大欠事為言其恠誕甚矣僭猥極矣如此妖妄之人決不可使之仍隨臺史之列干預山陵之事而其妄議先陵之

罪不可不懲請花梁僉使許彬拿問定罪承宣之職在於出納惟允而許彬之疏敢以僭猥恠誕之言更起遷動先陵之議則所當即為退斥而矇然捧入不可無規警之道請當該承旨從重推考

請拿金德遠事避嫌啓

全奉

臣謹按大典推斷各有匿名書雖干係國事父子間亦不得相傳之文夫干係國家之事非人臣所可掩置父子之間何言可諱而立法之意若是其嚴截者慮患之道可謂至深遠矣近來此法不明國綱大壞妖訛之繁滋世道之潰亂日以益甚而人情習狃

恬莫知恠有識之寒心固已久矣頃者畿營所投凶
書雖有填名繫牌之事首告逆變斷無露狀之理滅
跡迹遁足明假冒之情其為匿名書不待智者而知
之矣為藩臣者所當依法燒火以絕姦流而乃敢登
聞 朝廷致有深夜 命招將相之舉設鞫推問終
成捕風徒令無辜逮獄奸人竊笑物情之駭惋 國
體之損傷為如何哉此固出於倉卒驚動不能處變
之致而今若曲加原恕有所饒假則將無以塞奸宄
之路絕禍亂之萌日後之獎有不可勝言者故臣於
今日本府之坐以京畿監司金德遠不可不拿問定

罪之意發言而僚議參差竟未歸一此無非如臣無
似忝居臺憲言議見輕之致何可晏然於職次乎請
命遞斥臣職

因李翊相事避嫌啓肥

臣於頃者以銓長請遞事安有所論而人之名望輕
重雖有物議或自知其心之不服則固已料之矣
雖然銓衡之官責任甚重承當之人匪榮伊懼因一
輕彈得解重負意其必含然無所懊恨矣伏見其前
後疏本辭意張皇怒氣彌勃一則曰不能見幾一則
曰鬼忤人猜又曰遭此無限狼狽又曰身名已辱被

人凌踏至於此極有若以臺論出於猜媚橫加醜詆者然噫此何言也夫望輕於冢宰者果為身名之辱則人之得保身名者幾許稀鮮其擁柄者果為無限狼狽則人之不遭狼狽者幾何似此事理臣未之知也且設有宿德重望之人而人之論之者只曰望輕則在他人猶不可直謂凌踏況在自已反求之道果可如是下語乎乘怒不擇之言固不可一一爭辨重傷事體而一疏二疏侵攻不少閱歲之後猶且未已臣亦困矣此已不當終始默然而且臣於日者有問知事招金吾吏再次送人終不來現至以慢辭相加

臣雖罷軟既忝為法官則吏胥之徒何敢侮辱乃爾
耶人心之悖惡國綱之鮮弛斯可見矣第以其上
司之吏故不敢任自懲治依例移牒後刑訊矣今聞
大臣重臣大以為非云此必誤聞傳說之言有所云
云而既是公朝酬酢之言則何可晏然而已乎以此
以彼俱不當仍冒職次請命通斥臣職

因金鎮龜䟽避嫌啓

五月

臣情危病視坐道君命陳章請罪亦違罪譴一味
惶悚靡所自容不意茲者又以同僚處置事召牌
再降名義是惧更難他顧不得不黽勉扶曳祇詣臺

地而念臣所遭線紆異常以大體況言則李鼎命等
侵攻出於臺議既張之後雖有素忿反詈之言似不
當深嫌而以近來臺規言之則既謂之迎擊逞憾又
以身負重累勒加醜辱身居臺職者遭此污蟻曾無
仍蹲之例豈可以含血之噴而因廢其自潔之道耶
雖蒙聖明反復誨諭終不當泐忍盤據以壞臺體
而又得伏見工曹判書金鎮龜疏尤不勝駭然之至
夫金春澤事實國人之所共言也第無一人為殿
下言之者故臣於前疏有所附論然乃若以輿誦言
之則只舉什之一二者不但以告君之辭不可不詳

審論人之道不欲其已甚耳今者重臣之疏上以積
忤於奸凶為其張本下以見溺於獄辭為其證據欲
為其子清脫之地噫嘻甚矣溺之至斯也今春獄事
慶咸等諸賊初無鉤問之端箕疇等兩人徑斃一夜
之間春澤干預之事雖未及現露於文案而若其與
箕疇綢繆之跡使僣人攔入之狀有目皆聞有口皆
言身稱士子者乃與不逞之徒昵狎異常果因何事
鞠廳至嚴之地遣人尾隨抑出何意雖其慈父可得
以掩護之耶如令同情之跡明出於諸賊之招著在
於文案之間則臣之所論豈止於早加裁處放而遠

之云爾耶父子天倫也莫知其子之惡固人之通患
然如春澤所行閭巷孺靡不喧沸則為其父者亦
豈不少有知聞而其所為言乃至於此隱欲歸臣言
於虛妄之科臣竊為之慨然也然既被其斥不可晏
然於職次也決矣臣不量時勢妄有陳論被人嗔詬
陳章自劾前後煩複今又喧瀆於清齋之日臣之
罪戾死無所逃請命鑄斥臣職

東溪集卷之十目錄

行狀

高祖考 贈領議政行領敦寧府事潘城府院
君府君家狀

承政院右承旨竹窓朴公行狀

領議政益寧府院君鶴谷洪公行狀

墓誌銘

吏曹判書晚休朴公墓誌銘并序

處士朴公墓誌銘并序

司憲府掌令朴公墓誌銘并序

通德郎朴公墓誌銘并序

成均進士金君墓誌銘并序

墓碣銘

贈戶曹判書韓原君李公墓碣銘并序

墓表

曾祖考 贈吏曹參判行司僕寺正兼 內乘

府君墓表

先考 贈吏曹參判行廣興倉守府君墓表陰

記

兵曹參判李公墓表

墓碑

亡室

贈貞夫人沈氏墓碑



東溪集卷之十

行狀

高祖考 贈大匡輔國崇祿大夫議政府領議
政兼領 經筵觀象監事行輔國崇祿大夫領
敦寧府事兼五衛都總府都總管潘城府院君
府君家狀

公諱應順字健仲朴氏系出羅州潘南縣高麗末有
諱尚衷官右文館直提學號潘南先生以道學忠節
著名 本朝贈議政府領議政謚文正寔公之七代
祖也六代祖諱嘗號漁隱 太宗朝佐命功臣封錦

川府院君官至議政府左議政謚平度五代祖諱葵
觀察使高祖諱秉文中軍司直曾祖諱林宗僉知中
樞府事 贈吏曹判書祖諱龜年吏曹正郎 贈議
政府左贊成考諱紹弼治川先生官司諫院司諫
贈議政府領議政三代之 贈皆以公推 恩也妣
貞敬夫人南陽洪氏司膳寺正諱士俯之女也公以
嘉靖丙戌六月十一日生甫三歲姑郡守朴公秀榮
之妻取養之九歲治川先生捐館公就外祖洪公仍
得受業於柳斯文祖詢已能善學不倦稍長又與弟
退菴公應男遊於成笑仙悌元之門笑仙亟稱許之

宋主庵麟壽嘗至笑仙家見公兄弟歎曰朴京可謂
有子矣 中宗大王寢疾城中憂懼多急於婚嫁不
能倘禮皆公未娶或有勸公循時習者公固辭焉後
朝議退論其時嫁娶之非家長多有被罪者洪公乃
撫公而歎曰微爾之賢吾幾不免矣乙卯中進士試
丙辰 除義禁府都事初治川先生以高方正學名
重士林為奸臣安老所擠歿于陝川時議方憐惜之
乃求諸子之良而尉薦之公遂有是 除時率三十
一矣己未序遷為司僕寺主簿未幾坐事免庚申拜
司憲府監察辛酉出為安陰縣監莅下以寬簡又能

奉法不畏強禦癸亥遭養母喪解官乙丑終制拜敦
寧府主簿旋移內膳寺出為龍仁縣令隆慶己巳即
宣祖大王即位之二季也 懿仁王后膺寤寐之

求既文定公陞拜敦寧都正是季冬十一月 中宮
正位公又超拜領敦寧府事封潘城府院君庚午春
兼都摠府都摠管萬曆戊寅丁內憂廬墓于楊州因
毀得疾庚辰四月 上特遣中貴人勸以艸木之滋
公乃黽勉從教未幾復初既而疾益甚為延醫調治
始舁還京師舍于外是季冬 上體梓違豫公聞之
驚憂病仍單子弟請入正寢公猶不肯遂終于外舍

時十一月初十日也春秋五十五計聞上驚悼輟
朝三日官庀歛葬之具翌季辛巳某月某日葬于揚
州金村成坐之原即洪夫人墓後左麓也公天性溫
雅風儀端正接人一以悃幅絕去邊幅畦畛言笑之
間和氣藹如也孝友純篤弱冠服養父喪廬于墓下
奠酌之物必躬自具之養母之喪既服暮暮後猶心
喪以終三季遭內艱也季已踰五十矣疏水之節一
遵禮律竟以是成疾早孤而事伯兄如嚴父動靜必
咨有無必共既貴嘗微失其意輒躬詣門外痛自摧
謝友愛諸弟恩義甚至敦睦族黨無間踈遠甥姪之

孤者撫愛教育無異已出焉素喜儉約不悅芬華少
時嘗從養父於安岳任所郡有聲妓而公若不見也
閉門蕭然惟與寒儒講讀書史而已 嘉禮時自本
家發書州郡受其賂遺故事也公一切不為只以
內賜資裝從簡成禮治第惟務苟完不求侈美取破
家故材補綴成之隣家地陲入外庭勢頗偪窄或有
請買者公輒止之曰容我車馬斯已足矣受 賜貂
裘平居不敢著衣服飲食居處與微時無大異者尤
以內戚干政為國家弊習恬靜自飭門庭寂然如寒
士家惟時與微時親舊相對而已然或聞善士登庸

則輒喜形于色每以國嗣遲暮為憂鬱結不已夫
人完山李氏宗室文川正壽甲之女生一女一男女
即懿仁王后無嗣男東彦官至司僕寺正娶承旨
鄭淹女亦無子取從弟觀察使東說子演為後官至
司憲府大司憲女適承旨吳翊內外曾玄懿數十百
人嗚呼公之捐館距今殆百歲矣舊歲家壻皆軼於
兵火公之懿行遺範他無以考徵而惟栗谷先生撰
其墓銘曰溫然有著于色退然有蘊諸躬豈弟伊人
美不愧於位崇又於經筵日記書之曰某以王
妃之父少無干政之習時人不知有國舅人多其

恬靜此亦可以概見矣今謹因李先生所撰碑文附以一二記聞為狀而誠所謂掛一漏萬嗚呼痛哉玄孫泰淳謹述

通政大夫承政院右承旨竹窓朴公行狀

曾祖考諱璫成均生負 贈承政院左承旨

祖考諱大夏羅州牧使

考諱鉉成均生負 贈承政院左承旨

公諱元度字仲憲號竹窓羅州潘南朴氏麗季有諱尚衷號潘南先生官右文館直提學 本朝贈領議政謚文正生諱嘗我 太宗朝佐命功臣官左議政

封錦川府院君謚平度文正公之道德節義平度公
之勲業故事俱載史乘平度公仲子諱薑策佐翼功
封錦川君 贈左贊成謚世襄公其八代孫也生諱
耜官執義其孫寔我 仁聖王后以廢紀恩 贈領
議政生諱堧官新溪縣令生諱膺官木川縣監生諱
澍階彰義校尉即公高祖考也公之王父牧使公及
父 贈承旨公皆有文有行值世乳不顯公妣全義
李氏學生光林女判書龜齡之玄孫也以天啓丙寅
九月廿四日生公聰穎異凡甫五歲見伯氏受業輒
從有聽之便已通曉自唐虞三代以下帝王世系皆

能暗記不錯至成童文詞已大進矣丙子避寇於湖
西蘭池島一日有言寇至者島中大擾公笑曰海深
島遠虜無舟楫乃能飛渡耶此必訛言也宜縛送言
者於官府以治之耳俄而果自定時公率纔十一聞
者莫不異之戊子中司馬試是歲丁內艱哭輒嘔血
自是得疾沈淹服闋後赴試圍屢以疾作不能卒篇
而有卒篇者多為諸考官所取終為主司所黜至有
已書優等而漏於榜者癸卯始以明經登甲科第三
人例授司膳寺直長序陞六品遷義禁府都事遷拜
成均館典籍移司憲府監察轉工曹佐郎丙午因出

為清安縣監先是公在太學時齋儒有作文譏嘲當
路者當路者誤認公所為噪之深公之蹭蹬於公車
抹掇於官途初皆坐此云時顯宗大王將幸溫陽
公拜清安翌日即辭赴溫陽行宮策應劬午公隨事
拮据無不整辦一路稱之縣自兵燹以後邑居荒殘
殆不成樣公在任累年自奉甚簡俸廩有餘乃鳩材
僦功初建公廨凡六十餘間而民不知勞民有從兄
弟訟鷹于官者公命解縱其鷹責其人以義皆感泣
而退公謹於奉法寬以為治均田賦役並申條理課
農勸桑咸有經紀秩既滿丁辛亥大侵方伯啓請

仍留公盡心調賑濟活甚衆至秋乃得解歸邑民至今懷之壬子夏復拜典籍冬轉兵曹佐郎癸丑陞正郎俄拜司憲府持平自是連居臺職為持平者四司諫院正言者三矣間亦出為海運判官在兵曹也掌軍色素稱劇任而公適兼精抄廳郎又差寧陵遷厝都監郎事務至集公左右酬應無所滯礙兵曹判書金公萬基都監堂上閔公維重咸加器重相與歎服不已在臺職也更有受賂於舉士而事發者先王震怒特命梟之公以謂吏罪當死而法宜取供陳啓爭之先王屢下嚴教公無所撓屈得請乃已

仁宣王后之喪大臣以議禮失旨被罪 天怒嚴
重朝著汹汹公又與同僚力爭不已至今 上初率
時事將變機括已成而兩司之官適皆有不安事引
疾呈告都承旨吳始壽 啓請牌招而寬閒放縱紀
綱解弛等語欲挑激 上意諸臺又以此引嫌不出
公獨詣 闕陳 啓曰喉司職在惟允不以優容臺
閣之意輔導 君上乃反乘時排軋云物論譁之已
而上章極論公私之辨仍請罷內需司諸宮家柴場
鹽盆各衙門屯田皆當世功務也疏入報聞時一番
人既用事兩司遂希旨据據持尤齋宋公時烈甚急

將以售傾陷之計公慨然

啓辭直其誣枉無所

諱避知舊之來見者皆言承旨公率高不宜以此賈
禍至有貽書責之以忠孝本無二致者公不得已刪
沒其危語以此止於通職公性謙恭雅不欲以論議
自標擢人亦不得以色目指公至是始忤於黨人矣
乙卯出為忠清都事丙辰丁外艱戊午服闋除黃
州判官州在西方孔道因官守者頻遞吏胥乘間蠹
竊官庫蕩然且於北使至必濫張策應之需貸用於
商賈與商賈之為監官者共為姦利官不能詰也公
始至不用刑訊而鈎得其狀徵吏所偷綿布四十餘

同又囚其商賈將殺之賈怖畏冀免死即吐款因直
告北使接待時所需之費較前濫張之數不翅減半
公貸其死命錄其所告辭歲置之北使至則擬以酬
應餽饋贈遺無所贏縮自是定為恒式而公私始蘇
矣西路自亂後朝家既不敢治兵為守令者亦自
拋棄戎器徒存虛簿弊不可用公逐年修補無不精
新而以銜能為嫌不令上司知也適值兵使點閱乃
狀聞而蒙表裏之廢公之為故於橫歛牟利等事一
切若免而惟以簡約自居承板蕩之後在任未滿三
歲庫藏皆充羨焉庚申以持平徵還公在黃得水土

疾病不能供職而遞復拜兵曹正郎俄陞司憲府掌
令未幾辭遞差接慰官又以病不得行時有陳疏者
語侵公又有謫公於銓地者公不自安因求出外辛
酉拜豐德府使潘南先生墓在長湍而距豐德府治
纔一舍 朝廷適有 贈謚祭墓之事公會宗人于
墓下以延之既事諸宗人物石記其事公寔主張焉
壬戌夏辭遞冬拜掌樂院正癸亥以敬差官赴鏡城
還拜通禮院右通禮又 除承文院判校未幾陞資
拜富寧府使時 朝廷割富寧之茂山設為府多有
經理事是以擇公而莅之北路無他征役而但於大

小使客往來及僞生赴舉罪人到配時輒責立夫馬
於民民甚苦之公料理得布六十餘同擇人掌之使
取其奇贏以雇立之名之曰雇馬廳民始賴焉甲子
以病遫歸乙丑拜掌隸院判決事關節請托一坊屏
斥有人率長於公公素敬焉來囑其訟公以溫言拒
之其人素病瞶不曉公意後又再三來言公不得已
判其狀曰此訟立落素定可愔張師德三及吾門遂
却其訟其人大慚怒公之聽理惟公不肯徇私皆類
此由是多失巨室心有為憲長者將舉他事以劾之
歲責之曰吾聞朴某曾決台家訟台可為是耶憲長

報然而止丙寅轉刑曹叅議俄入銀臺拜右副承旨
序陞右承旨自是連而復入凡為左副者三為右者
六矣間亦復拜刑曹叅議又為兵曹叅議公素抱病
至是尤勞悴力求外補丁卯出為富平府使至己巳
春時事又大變矣公即投綬而歸不欲仍留京輦
乃僑居於龍山俄有四月之事公罕對人晚乃得聞
倉皇入城則吳判書諸人已被罪而禁不受章奏而
庭請撤矣公大傷慟而陳暴無路恨在京儕友之不
早相聞責以患難相負還歸江上悒悒不已臨江始
病數架屋定為終老計杜門謝絕惟以書史自遣而

已因改號稱龍灘散人庚午八月為祭墓仍省伯氏
往于水原地偶感疾日困殆自知不起謂子彙登曰
吾在江舍時有言於而母而問而奉行可矣蓋公自
江上向水原也謂夫人曰殮葬我柩毋侈於吾父母
喪為也至是又以戒子云易簣日神識不亂甥姪有
自外來省者公猶問之曰妹氏健否命侍者扶坐更
衣而逝九月九日也享年六十五以十一月二十一
日葬于水原魚吞面旺啓山負乙原夫人驪興閔氏
學生聖輿之女副提學起文四世孫也封淑夫人育
二男三女男長彙登進士次世登女長適權益隆次

適李箕輔次適崔昌振彙登娶府使李壽曼女生三男世登娶士人李任漢女李箕輔生二男二女公天性孝友早喪所恃幾至滅性迨丁外憂衰且病矣猶能不憊不怠免喪既久而每居閒輒悽然哀歎有問之者則曰孤露之後更無人世之樂不自覺而為然也至生日則悲楚竟日家人感之不忍為設酒食焉兄弟二人伯氏在水原公事之愛敬備至雖從仕在京有暇即匹馬徃省相對怡怡衣食服用之物雖微必分焉尤恬於勢利不事交游嘗寓居安國坊黃承吉玠尹監司攀俱在此隣見其守靜不出相與歎曰

其非今世人也為之就見焉釋褐初由司贍遷金吾
俱非文職也有勸之不仕者公曰事君之道可擇官
而從仕耶奉職惟謹在清安人又以久滯下邑為歎
者公亦不屑也人方逐逐公乃舒舒人皆囂然公獨
澹如言若不能出口體若不能勝衣持身則能推分
無求遇事而能守正不移未嘗以利害之私有所變
奪也立朝三十季屢典州邑而家無餘財居官謹慎
終無縲紲之厄詞藝過人為舉業時有所制輒為人
所錄公以為範式嘗作靈臺修理上樑文趙龍洲絅
見而歎曰理窟中先焰萬丈言雖誇而可見其深服

也又嘗作清州拱北樓序尤庵評之曰長言眷容短
語飛鳴云顧公既不喜著述對人語亦未嘗譚及文
章以是世尠有知之者噫世之知公尠者豈獨詞藝
為然哉泰淳與公同祖平度公公以敦睦之誼視之
甚厚也今者公長胤進士君在裏經中以狀文見托
不敢以不文辭謹取進士君所為行錄兼附疇昔之
所聞覩者掇之如右以俟立言君子之採擇云通訓
大夫前行竹山都護府使朴泰淳謹狀

奮忠贊謨靖

社竭忠効誠炳幾寧

社切臣

大匡輔國崇祿大夫議政府領議政兼領經

筵弘文館藝文館春秋館觀象監事 世子師

益寧府院君鶴谷洪公行狀

本貫南陽人

曾祖考諱係貞藝文館待教 贈吏曹判書

祖考諱春卿守黃海道觀察使 贈領議政

考諱天民承政院都承旨 贈領議政

妣貞敬夫人興陽柳氏

公諱瑞鳳字輝世號鶴谷姓洪氏南陽之洪為海東
大姓其先蓋中國人唐末黃巢之亂浮海而東家于
南陽仍為籍焉有諱悅翊戴高麗太祖封匡翼效節

獻襄定難弘濟奮庸亮采保乂經濟功臣位三重大
匡太師公其二十一代孫也有諱灌官司空尚書殉
節於李資謙之亂事具麗史節義傳 贈推誠報國
功臣同平章事判禮部上柱國謚忠平公之十六代
祖也有諱奎高麗元宗時以御史中丞擒賊臣朴惟
茂忠宣王時策功臣圖形壁上封南陽府院君謚匡
定公之十一代祖也自太師公以後世著名德勲閥
奕烏與麗朝相終始入我 朝有諱敬孫能文章與
李樛軒石亨同撰大學衍義補以進 成廟廢嘉之
官至守成均館事公之五代祖也生諱閔德官奉常

寺副正

贈吏曹叅議曾祖待教公字叔幹早世未

究厥用祖考觀察公字明仲號石屏登重試壯元文
章筆法皆名世考都承旨公字達可有厚德再娶濟
用監主簿柳攄之女柳亦海東名族高麗侍中濯之
後也柳夫人鑒識淵深有文章能博通古書而雖一
家子弟間未嘗以筆札見焉公以隆慶壬申十二月
二十一日亥時生是季春有卜者韓億齡占之得彩
鳳飛雲之兆賀曰來月必得濟世奇男既而娠公及
彌月不解又占之曰天降貴人必擇吉辰翌日亥時
最吉及期公果生焉公之錫名蓋取其占辭云公生

而明秀岐嶷異凡甫三歲承旨公捐館公匍匐於承
旨公平日坐卧處遍尋之家人指木主曰此乃而爺
也自是公見神主輒號哭見者皆嗟異之六歲就學
外師自知屬文往往有驚人語季父益城君聖民試
呼猫字使之作句公應聲曰猫鳴驚千鼠益城大奇
之曰此兒非徒能文章小人必畏之矣一日與隣兒
同詣師家逢獬犬噬衣盡破公從容還家易衣而往
受業如常師已聞知問曰犬咬汝乎對曰衣破而身
無傷也汝何自若而不言也對曰衣破非關於受業
是以不達也聞者咸歎異其器度乙酉春讀書於江

上松江鄭公澈歸湖南路過公所問姓名曰若乃吾
故人兒也盍以一言贐我公即席製詩十五韻意皆
箴諷松江大加稱賞戊子委禽於獨石黃公之門獨
石乃長溪府院君芝川公之胤子也芝川見公著述
歎曰率雖小有異才我不如也庚寅中司馬試壬辰
倭寇至公奉柳夫人避于關東先是公知亂將作與
親知經營避地計時方昇平人多笑之及是倉卒無
不顛頓者長溪公父子陪兩王子向北關遇公於
鐵原給馬要與同北入公辭不行人頗訝焉及長溪
公遭難於北路一行無得免者衆皆服其先見焉甲

午登文科別試入承文院自正字例陞著作博士兼
奉常寺直長丁酉受由省覲於平壤時柳夫人避兵
於關西未及奉還故也俄而倭寇再至 朝廷論罪
朝士之間乳迯避者吏曹判書許箴素不悅公遂以
公名混抄其中至擄示朝堂人皆駭憤己亥復拜承
文博士陞成均館典籍移刑禮兩曹佐郎皆以病免
庚子拜司諫院正言補拜弘文館修撰移吏曹佐郎
兼侍講院司書選和製 教辛丑詔使顧天峻出來
月沙李公廷龜為僉使極選僚佐朴南郭東說李東
岳安訥及公為從事官車五山天輅金南憲玄成為

著述官權石洲輯又以白衣從行文章之盛一時
稱酬唱詩文刊行於世壬寅一番人用事鄭仁弘為
都憲公為其所駁罷癸卯拜禮曹正郎轉成均館司
藝差京畿左道量田御史時兵荒之餘經界皆亂案
帳無存公隨地均賦輕重不失畿民賴之甲辰出牧
星州丙午罷還丁未復拜司藝戊申拜弘文館校理
宣廟昇遷差國英祔廟都廳又兼延接都廳通
校理拜成均館司成移弘文館應教賜暇湖堂禱
應教拜護軍中重試甲科陞堂上自石壁公至公三
世皆被選湖堂中重試世罕有也已酉以都司迎慰

使往龍灣還拜江原道觀察使公在星州治頗尚嚴
及莅東關見民事凋殘未嘗輒事複楚每行部時屏
公道從跨馬垂鞭而過過之者不知其為方伯也嚴
明黜陟蠲減賦徭一方之內惠化大行解歸之後吏
民月送節產終公世不止許筠之亂傳聞公將避地
於東嶺馬聚糧掃廬舍以待於境其遺愛如此庚戌
拜承政院同副承旨又兼承文院副提調禘拜禮曹
叅議以聖節使赴燕京還至長牆上遇建州夷入貢
者先是夷人遇我使行輒肆劫掠故一行皆駭散至
是夷人駐馬呼譯只問燕中麥價而公行中皆來賀

公愀然歎曰夷虜劫掠乃其素性今者鉉束如此可見其恣令之能行此天下之憂也爾輩乃以得免劫掠為幸耶壬子又拜同副承旨光海引見平安兵使李守一公適入侍陳建夷可憂狀仍言中朝城制甚悉光海謂守一曰承旨所見是矣倘豫之策鄉其盡心城池規畫亦宜一如承旨之言守一赴任改築寧邊城而蓋亦倣公所言云是季春誣獄起獨石黃公罹禍公上疏乞免光海特罷之自是公絕意世事杜門屏居惟以詩酒自娛家雖屢空而晏如也公之外黨羣從方乘時用事列於權要每勸隨世低昂以利

害鉢之公答曰欲令我為白首賊耶聞者縮頸嘗過
相知家飲酒朴鼎吉適來到公聞其來即陽醉倒睡
鼎吉素慕公名為之喚醒公惡之起吐於其面鼎吉
慚怒而公公引滿哦詩不以屑意李爾瞻許筠輩欲
盡笑一時名流百計構陷又投書西宮公與北渚金
公塗清陰金公尚憲之名皆在其書中人莫不危凜
而顧公名德自持無釁可摘卒不能加害焉公屏廢
既久而聲望素重每當有事時輒有起用之議毛文
龍始至也難其儔接倘局請以公差送啓州既具為
忌疾者所沮後又以詔使將至欲藉公華國請起廢

用之仍並舉一時坐廢諸公因此多被甄收而獨公
及北渚金公清陰金公愚伏鄭公經世竟寢不下蓋
惡其守正不撓也時彛倫既斁昏亂日甚先朝舊
臣皆逆散在外公日夜憂憤嘗以一絕寄象村申公
欽有夢唱定風波之句意有所在而申公不答公與
北渚金公素相善至是遂與密謀匡濟因申公景禎
具公宏諸人聞仁祖大王有君人之度乃定推戴
之議糾合義旅大會於弘濟院奉仁廟正位寔天
啓癸亥三月十三日也即拜公兵曹叅議旋移吏曹
是年夏因外舅獄力辭得還俄拜司諫院大司諫稀

拜右副承旨又兼承文院副提調秋論定靖社功
蓋撥反之際公之勲勞實多有因公家得聞密議誤
以宣露者非公過也然而坐此為三等勲物情稱屈
賜奮忠贊謨靖社功臣之號進資封益寧君陞
左副承旨公之在右副例兼刑房時大獄連起公隨
事敷奏平反甚多上甚任之自是在銀臺凡二季
終不換房甲子正月李适反臨津守兵潰上倉卒
南幸命公扈衛慈殿仍以標信二度付之曰臨
急以此便宜從事公受命而出馳至崇禮門夜已
深矣守門將士皆散公城門閉大駕且至前隊阻

不得出人馬駢闐公令從人持大石至欲撞門鎖有一宰臣止之曰人臣何敢撞國門乎鑰匙在兵曹可急取來也公回指大內火光曰都民已亂宮闕被燒兵曹可得至乎事急如此而乃欲膠守常規乎事定之後撞破城門之罪吾自當之遂促令破碎門既開軍馬如水決而出公先至漢江民皆赴散持船者皆中江下碇呼之不應有武人禹尚中者從公行公素知其多力善水使往取其船尚中即游至中流攀舷入擊仆船人船中皆懼伏遂喝令刺船得五六艘以來乃得利涉時夜尚未晨燈火明滅將士與從官

相紛挐將欲潰散公謂大將申景楨曰至尊尚未登
舟而擾亂如此賊若猝逼則不可為也公宜急救軍
陳於高阜建旗鼓明燈燭賊雖來見我有備必不敢
輕犯矣申公乃擬隊整伍結陣於左右山上懸燈擊
柝衆心始定是日微公事幾殆時 慈駕尚未至江
上人情憂疑公慨然謂從者曰 慈駕不至乃我之
罪吾當先投江水以謝不忠之罪終乃至誠導扈以
達 行在及賊平返 蹕以勞加嘉義階陞右承旨
祔拜兵曹叅判兼同知 經筵成均館事 世子右
副賓客又兼籌司堂上俄拜弘文館副提學移都承

旨丙寅詔使姜曰廣出來又以副學差鐵山迎慰使
丁卯春邊警遽至上出章江都公以都承旨扈從
上疏請邀擊於平瑞之間報聞秋復拜副提學大司
諫成均館大司成吏曹叅判戊辰正月柳孝立等謀
逆各遣其黨變服載兵器入城刻日犯闕許禔聞
其謀前一日走報於公公意通于廟堂設機擒捕諸
賊皆伏誅策勲二等賜號為竭忠効誠炳幾寧
社功臣超正憲階拜漢城府判尹兼知義禁府事俄
拜司憲府大司憲時罪謫者多在北邊公以疆域未
寧慮有他虞啓請移之內地未幾梁景鴻韓玉等

潛通虜中事覺伏法人皆服公遠識移拜禮曹判書
己巳禘拜議政府右叅贊兼弘文館提學復拜禮判
兼知經筵自是累拜大憲禮判庚午冬拜吏曹判
書辛未慈殿違豫既而平復以待藥勞陞崇政階
時上欲追崇章陵廷臣爭之未已延平府院君
李公貴素主追崇之議而傳會者皆見斥於清論以
此發怒於銓地遂於榻前斥公曰如此之時洪某
豈可為銓長耶仍醜言詆公至以生者為死故目無
名而謂之注擬其虛妄如此大臣陳其誣狀上既
已燭其寃因公辭疏累下溫旨公連章力辭而疏中

有朴彭年忠臣之語 上怒命推考因此遞職癸酉
復拜左叅贊移禮判甲戌拜兵曹判書又兼藝文館
提學以文衡坐次有妨辭遞提學詔使盧惟寧出來
公為館伴乙亥 元宗大王祔廟禮成公以都監堂
上陞崇祿復 除禮判兼拜兩館大提學又兼判義
禁府事是歲七月京城大風折拔 太廟內巨木七
十餘株公於筵中進言曰變不虛生必有其應而風
動物也多係兵象其應尤捷宋將劉錡遇暴風曰此
乃虜至之應也整軍以待得大捷風之應於兵尚矣
辛卯季間京都亦有風變迎恩門鐵鎖至於中折而

翌季倭寇大至今虜虜如此風災甚於辛卯臣竊畏
之不可無先事之戒其說反復不已而卒不得有所
施行丙子擢拜議政府右議政仍兼 仁烈王后山
陵扃護使俄陞左議政夏司諫趙綱上章誣公以受
人賂馬其說無根 上疑之令政院詰問其言誰所
受綱不肯首因亂舉他事詆公益甚皆摺摺無其實
上愈疑之欲下綱吏詢于諸大臣北渚金公及仙
源金公尚容以謂臺諫雖重不過與宰相等耳今綱
所陳大臣事非細故不可不究覈處之於是 上遂
下吏問之時公因綱言出在江上陳章待罪聞綱之

就獄上疏言綱之不為的指言振亦守自己體面
國家二百季待臺諫之道緣臣取謫而壞了後雖有
可言之事言官以敢言為戒緘口而已則非國家
之福也言者亦多以拿問臺官為未安事得已蓋綱
之為銓郎公有所不韙者及其薦中書公又顯言斥
之綱聞而嚙之乃誣公如此清陰金公時為吏判上
疏陳卞仍極言人心世道之不可為遂棄官歸田公
前後辭疏十餘上呈算至四十度始許遞免是年冬
十二月清兵大至上將出幸復拜公左議政公扈
駕入南漢山城翌日有移蹕江都之議上命

公留守本城 大駕已出而不果行既而長圍合

上命公往其陣議和公聞 命即出親朋送之者皆

瀉淚公則怡然不變也自此清人數至城下求見城

中人 上輒命公出應之公隨事爭辨清人無以絀

也前後往返凡十二水雪塞路山坡峻滑公徒步上

下足指皆凍觀者無不愍然丁丑隨 駕還都俄遭

內艱戊寅倭書來多有探試之語朝議難於為答時

當大亂之餘人情汹汹公自以義同休戚不可以身

在憂服之故有所愬然遂上疏倘陳接應之道 上

優批答之己卯服闋拜領議政庚辰冬清人疑我國

潛通上國責致首相吏判都承旨於灣上先數日日
官言台星西流台位當有行役已而公果西行既至
拘留數月窘辱備至公無所撓屈清將嘆服乃慇懃
告別而公辛巳春以風疾乞免不許壬午又固辭遞
為益寧府院君甲申復拜領相未幾以坐次降左相
乙酉因風變上䟽極陳弼災之道時元孫冲弱儲
位久虛上以孝宗大王有聖德欲冊立為世
子詢于羣臣首相北渚金公既知上意所在對無
異公進曰聖意以宗社為重有此非常之問而初
業之後世守宗統是乃經常之道小臣不知所達於

是判府事沈公悅贊成李德河皆言公言是判府事
李公敬輿曰左相之言爲世之經常也上竟從首
相議是歲火入東井日官言大臣危七月公患脚疾
日益危苦上遣右丞旨金尚問疾命內醫不離
看病疾革而精神不亂侍者有問之者公曰自腰以
下已化矣俄而恬然而逝八月初八日也享年七十
四計聞上震悼輟朝三日遣都承旨金光煜賜
吊問孤例賻之外又加賜賻贈十月官庀襄事葬
于積城治南先塋側坐壬之原從治命也公狀貌不
踰中人而英彩動人姿性簡重而識量深遠見之者

輒知其為大人國器也。燕居必整冠帶，端坐未嘗設
惰容。至老猶然待人言笑，樂易和氣，藹如也。誠孝出
天，侍柳夫人，承事無違。丁憂，年垂七十矣，哀毀踰制。
三季之內，饋奠必親，哭泣必氣盡。後已人有隱其老
勸以自抑者，公曰：「吾三歲失怙，未行喪制，至痛在心。
今慈母見背，豈忍以季老而不自盡乎？」早孤，事季父
益城公，盡誠未嘗離側。益城公提誨甚至，每歎曰：「吾
兄仁德未享遐福，吾常痛焉。興吾宗者，其在此兒乎？」
敦睦親黨，不間於戚疎，振拔賙救，一出於至誠。有庶
族子失所者，收而衣食之，四十季如一日。及其死，

為之殮葬朋友之際不以死生衰盛而易其心有遭
患難者撫其家屬曲盡恩義少簡亢見人有涉於非
義者若將免焉在朝或遭橫逆則初不芥滯於胸中
延陽府院君李公時白兄弟以延平之故頗有自阻
意公待之坦然每稱延陽公忠厚有才薦為守禦使
其後兩公皆有憂疑事人多慮其禍將不振公極意
救解事竟得已洪都憲茂績嘗以事侵公公則夷然
戒子弟曰臺諫之言雖過當不宜細較爾輩慎勿置
懷也洪公語人曰此爺度量人不可及也憂國如家
聞有事變不以在戚置骸而有間輒上章陳列罄其

意見再策勲盟 恩賜之外更無一畝之斥位既崇
高而衣服不用華美柳夫人嘗謂公曰汝幸位已高
雖服錦段非不衷也對曰不肖早失所怙得以成立
亦已幸矣素無才德濫躋至此每思之惕然不敢以
錦段近身也文章早成奇健深奧尤長於詩出韓入
杜自成一家李東岳詩名振一世見公詩輒彈指曰
骨子骨子嘗贈公詩有昌黎文後益寧詩芝川簡易
公能鼎立之語蓋心眼也所著述皆逸於兵燹胤子
觀察公蒐輯散亡有鶴谷集若干卷刊行於世公當
宣廟朝早蜚英館閣旋值光海昏亂坐蟄累年及

其遇會風雲終至位極人臣艱危之際勤勞弘多顧以奉承於板蕩之時偃屈於百六之運嘉謨英猷竟不得大有展布可勝痛哉夫人長水黃氏封貞敬夫人國初名相翼成公喜之後考承旨諱赫即獨石公祖考府院君諱廷彥即芝川公妣坡平尹氏佐郎諱儼之女以隆慶癸酉後公一季生以甲申十月先公一季沒與公同塋異室天姿柔淑奉君子無違行姑柳夫人性嚴事之敬慎怡愉未嘗有忤丁丑之亂避兵于江華舟膠淺沙見虜兵至以刀自刺仆於船中虜卒後侍者救之厓甦時公之子婦李氏外孫婦

羅氏同在船見夫人自刺皆赴海公之兩孫子儀子同年皆髫髻亦相隨溺死虜兵驚愕而公嗚呼於此亦可見公之家法矣舉一女一男女適大司憲朴潢即泰淳先祖考也有四男先君諱世相最長郡守曰世柱令曰世桓曰世楠先君亦四男一女曰泰辰叅奉曰泰春曰泰淳文科大司成曰泰珍女適進士韓配義世柱無子以泰春為後世桓有二男曰泰延縣監曰泰進世楠有一男一女男泰遜文科吏曹叅議女適大司諫金昌集男曰命一登文科官至觀察使初娶完山李氏殉節於江華舉一女適進士趙相鼎

再娶綾城具氏舉一女二男女適正洪萬恢男曰處
宇縣令曰處宙叅奉趙相鼎有二男二女男曰仁壽
都事曰大壽文科應教女適僉正李成朝次適僉正
沈廷協洪萬恢有一男四女男曰重聖進士女適進
士李塏次適士人尹滌次適修撰李光佐次適士人
趙尚慶餘男處宇有一女二男女適進士金昌緝男
曰九澤曰九采餘男處宙有三女二男女適士人鄭
夏臣次適柳時模次適朴壽昌男曰九鼎曰九範餘
男內外玄孫累十餘人外曾孫通政大夫成均館大
司成知製教朴泰淳謹狀

墓誌銘

正憲大夫吏曹判書無知經筵義禁府事弘文館大提學藝文館大提學知春秋館成均館事世子右賓客五衛都摠府都摠管晚休朴公墓誌銘并序

有若堂封於楊州水落山負震抱允原冢宰大學士晚休朴公墓也公諱泰尚字士行潘南朴氏晚休其號也上世直提學文正公諱尚衷以節義焯左議政平度公諱嘗以勲庸顯奕世蟬嫣德義不替至司諫文康公諱紹又以學問名節著事皆具史乘公即文

康公五世孫曾祖諱東善左叅贊

贈領議政謚貞

憲祖諱烜策靖

社勲吏曹叅判錦洲君

贈吏曹

判書謚忠肅考諱世堅右承旨

贈吏曹判書妣

贈貞夫人海州崔氏判官浣女也甲午登進士試辛

亥魁庭試歷典籍兵曹佐郎正言持平弘文館副修

撰修撰校理北評事吏曹佐郎正郎司藝洪州牧使

軍資禮賓宗簿司僕寺正間以暗行廉問湖南北關

已未擢重試陞通攸拜承政院同副承旨轉至左承

旨歷吏戶禮兵刑叅議判決事大司成承文院副提

調大司諫乙丑進嘉善拜平安監司又歷六曹叅判

都承旨司憲府大司憲藝文館提學同 經筵同義
禁副提管咸鏡監司差吊慰使赴燕出宰江陵甲戌
陞資憲乙亥進正憲歷左右叅贊吏禮刑工判書知
經筵春秋館事 世子右賓客都提管弘文館提
學兩館大提學當 東宮元服時為贊冠齒學時為
博士此公之履歷也公生於崇禎丙子十二月五日
卒于丙子五月七日以是年七月六日棄從先塋此
公之始終也公天姿端粹內行甚篤承旨公晚嬰疾
委頓公侍側扶護十季如一日舅氏家遘毒癘死喪
相繼親舊無不畏避公獨疾焉醫藥喪焉殮殯與僮

僕數人月餘褻五惡人皆服其誠義立朝忠亮自樹
為正言也嘗論事前席語甚峭上怒切責之公爭
之益力上為之霽威有大臣退語人曰朴正言真
可畏人也為承旨也上欲拿鞠臺臣之嘗搆誣金
相國壽恒者公於入對時詳陳金公受誣之由仍言
伊日聖教嚴重彼臺臣特逢迎濟私耳人君若以
喜怒取快一時則終有異日之悔且拿鞠臺臣亦關
後弊其說反復明白上皆嘉納識者莫不韙之然
勲戚諸人多有不快於心者謗毀不已暨公佐銓又
抑戚里子郎選戚里子曰積憾劾公上察其誣不

允公議皆為之憤惋公輒曰當時天怒震疊諸臣舉皆惶怖記注多遺漏而癸實者傳聞之人為此駭議無足恠已夷然不以介意公屢入銀臺遇事必據義守法爭執甚多上雖不盡允從而意嘉之及除西臬上引見謂曰卿久在近侍素知卿剛明卿其勉旃公之受知蓋不偶矣為叅贊時因求言上疏論李師命李翔不當伸而伸而異議者反遭排擊臣下偏黨縱肆之弊君上不自撻攬之失語皆深切上優批荅之有實中予病之教仍寢兩人復官事物情稱快在銓曹自郎僚屢歷佐貳世所稱熱官而門

庭寂然及秉衡慎惜名器恪謹憲格請托不至銓注
惟公數月間仕路為清前後出兩邑皆著治效遺愛
在民按關西南數月及還朝民皆奔走擁車有望
塵泣下者在北藩值歲侵預申列邑節用儲粟及時
賑貸民無捐瘠矣識量明敏雖倉卒急遽之際處之
安詳嘗試士湖西有疾呼火起火藥庫者滿庭沸擾
同坐者亦驚起公挽止之俄而諸生至進請開門避
火公笑而徐諭之曰火發焰焯其及避乎可安坐綴
文諸生愕貽始覺其妄而退仁敬王后薨喪出拘
忌疾上不得臨視禮多變節而儀曹適闕佐貳大

臣俾公權察事皆取決公隨宜酌處情文無缺大臣
為之歎服在西藩清使來詰邊氓越境者朝廷急
召公聽勘而無符信公歎曰藩臬之任乃欲以赫蹄
召致耶出次境上以狀馳聞朝廷始遣宣傳官持
右符召之既合符欲收公所受佩者公曰寧有旨
追我乎我自以藩臣赴召此符何可得耶持符者踧
蹢而退未釋褐時居鄉村屢空至躬親鄙事人所不
堪而處之晏如貴至卿宰不變素焉及卒歛殯之需
待贈祿而辦交遊甚簡公退却掃靜坐遇會心人談
論娓娓以古人文章事行指誨後生數十年来黨議

益甚而守正不撓無所詭隨每論事必以格君為先
一時清議倚以為重雖不悅者亦無以指摘訾議為
也恬於勢利謹於進取嘗曰人之惡德莫甚於躁干
罪萬過皆從此出來名塗要地必逡巡退讓而甲戌
以後見時事日蹙人懷退保慨然以盡瘁為期病既
困綴猶上疏論賑政諄諄如夢中語皆憂時憫世事
也上遣掖庭人問疾賜珍饌公已不能言流涕而
已大臣以公病請解見任上曰向聞其朝夕難支
今頗過數日得無有差道否大臣言其已危上曰
然則今姑許遽為之愍然計聞輟朝吊祭賻皆如儀

別勅有司庀喪奕所頒特從優厚曰以表予震悼軫恤之意 王世子亦遣宮官來吊擇 賜棺一具嗚呼此可見 聖朝君臣之際矣公詩文理暢而辭絮意淡而致遠閒雅深靜自成典則鑑識尤精一時新學以所業取質得其刺論無不驚服少志為己之學用力於洛建諸書義村尹先生一見許以豪傑滄江趙先生涑性簡高少許可聞公至必更飭衣冠曰此大儒不可以率少忽之噫公之平生處心行身蓋有所根基而顧公以近名為恥不自標置世豈有知之者也夫人豐壤趙氏即滄江女也舉二男三女男弼

純弼健女府使申瓊侍直李壽涵多學李秉哲弼純
娶士人李慶著女生男師任餘多弼健娶判書李奎
齡女生男皆多申瓊男錫夏翊夏女趙海壽李獻章
李真淳李壽涵女尹志溫李秉哲男女皆多泰淳與
公同祖文康公編髻從公顛毛種種矣詳公平生固
當無見踰者誌公幽堂義不敢辭辭不敢諛銘曰
於乎如公之德之才當求諸古人百世在下陵谷或
變賊義不湮

處士朴公墓誌銘并序

士有安於下澤款段而不顧乎高車駟馬甘於蹈海

而不顧為民於棄禮義之國者斯固非矯情異俗也
審定於義分而已是故苟慊於分則飯蔬飲水而富
貴如浮雲義有不屑則死生且不足論况貧賤乎彼
役役而逐逐而不知其渙浥疲黻無他不審乎義分
故爾若吾族祖朴公諱瀏遭世亂屏居無求於外季
四十沒於鄉廬知之者咸曰古所謂處士者即公真
其人也蓋公勞而頽秀長而勤篤一家期以遠到丙
子丁內憂旋值大亂見冠裳之倒置遂絕意於世服
闋仍自屏於廣州月川村以書籍自娛尤致意於性
理之書蓬堵茆屋瓢飲簞食處之晏如也人有勸為

貧而仕者公若不聞焉貨利之說不出於口辭受之
節必謹於微雖榮如之饋有不屑於心者必却之不
受居閒寓興時為古詩長篇譚藝者亦推服蓋閒遠
雅健不事雕績發於性情者然也公既不求知於世
世罕有知公者不幸蚤世諸孤時又多懿行嘉言不
得盡傳於世惜哉雖然嘗觀古管處士之著稱於傳
記者或以其一言或以其一節後之人皆能因著而
推微見小而認大尚論之士苟有慕公之風者識其
大而已亦奚待多乎哉公字仲遠潘南人文正公諱
尚衷之九代孫也文正公當麗季以疏斥北元被禍

事具麗史曾祖諱紹司諫 贈領議政謚文康號冶

川祖諱應福大司憲 贈領議政號拙軒考諱東望

吉州牧使妣光山盧氏生負守謹之女也公生於萬曆乙巳卒於崇禎甲申奕於鐵原骨坡乾向原配安東權氏縣監恰之女判書徵之孫先公二季生後公一季沒與公同窶而左祔三男二女男長世樞次世樟文科掌令次世樞一女適金尚堅次適房世貞世樞一女李漳世樟一男四女男泰夏女進士李彥緯宗室東平君抗李世設叅奉李萬稷世樞一男一女泰昌文科掌令女承文正字洪克濟金尚堅一男金

萬甲一女李某銘曰

人勸公出公不求榮人謂公處公不要名守義安分
志絕外營沁水療饑圖書玩情山谷翳翳誰識蘭貞
風雨蕭蕭不已鷄鳴鬱彼東州山高水清作此銘詩
用識佳城

通訓大夫行司憲府掌令朴公墓誌銘并序

公諱世樟字汝擇潘南朴氏十世祖諱尚衷高麗右
文館直提學 本朝 贈領議政謚文正九世祖諱
嘗 太宗朝佐命功臣封錦川府院君官至左議政
謚平度文正公之忠義直節平度公之勲庸事業俱

載史乘自此世載名德簪組不絕曾祖諱應福官大
司憲 贈領議政祖諱東望吉州牧使考諱瀏值世
亂隱德不仕妣安東權氏縣監怡之女公以崇禎己
巳十月三日生二十九中進士五十一登庭試文科
以五十無資例授典籍歷禮曹佐郎慶尚都事兵曹
佐郎正郎掌試于咸鏡南道遷淳昌郡守入為司憲
府持平成均館司藝移司憲府掌令遷授奉常副正
陞宗簿寺正出為寧越郡守以丁卯四月九日卒于
官奕於鐵原府骨坡里遷於朔寧治東舊基村未向
原配慶州金氏縣監震賢之女長公一歲一季沒初

寔於揚州青松面及奕公移而合祔焉公天性慈良
廉直無一毫嫺衍之色暴慢之氣對人接物澹如也
季弟學生公世撫蚤歿撫愛孤稚亡異已產為之營
筭傷舍雖家貧財匱無所顧難蓋退宿管兄弟同居
之意也伯姊窮居鄉村奉之甚至有所得必饋遺之
不絕其友愛如此居臺職不喜激訐侃侃不肯隨時
俯仰居邑莅民衣冠必整竟日端坐未嘗少懈有牒
訴者必委曲曉諭不厭煩複情偽既明詞訟自簡湖
南俗分黨構惡視邑宰色目互相告訐公至淳昌邑
子有妄愬者公輒罪之仍下令責諭聽理惟公無所

左右衆皆悅服在寧越值歲侵分捐月俸計口振乏
且除山田稅設常平倉以紓民役所到輒有惠政解
紱行橐蕭然既歿家無餘財公在韋布時不喜馳逐
登仕路不改其素有勸公交遊者公輒曰吾守吾拙
而已世固疑公於拙矣然及其當官莅事雖宿督親
愛者亦不敢干以私唯裁之以法蓋公所拙者名利
而固自有未嘗拙者存焉知者歎矣公一男五女男
泰夏女長進士李彥緯次東平君杭次李世發次叅
奉李萬稷季筭而未歸遭公喪得疾不服藥而夭泰
夏無子以從弟掌令泰昌子弼琥為後女李顯益李

彥緯一女三男杭一女三男李世發二男一女並皆
多銘曰

守窮約半百強登仕籍未十霜咲亨短而屯長何神
阨於善良三栢臺再桐鄉廉且介曷不臧從孫繼期
後昌誌幽宅戒毋傷

通德郎朴公墓誌銘并序

余族弟大叔有美質安靜守拙不喜交遊馳逐蓋亦
其庭訓然也嘗與余同攻博士業觀其志雅而氣潔
記性絕人為詞賦才思翩然謂其早晚大進需於世
而榮吾宗矣竟蹭蹬不遇季三十四遭內艱翌季又

遭外艱體素羸能自盡於制乃因鬱成疾以己巳四月七日不起未及祥期纔二日才不見售於世善不見相於神阨困窮毒卒之以天閼哀哉奕於鐵原骨坡里乾向原先垂也室慶州金氏士人載章女舉一女歸李顯益取從弟秦昌盛甫子弼琥為嗣弼琥娶正言金斗南女大叔名泰夏潘南朴氏潘南先生文正公諱尚衷十一代孫治川先生文康公諱紹五代孫曾祖吉州牧使東望祖處士諱濬考掌令諱世樟妣慶州金氏縣監震賢女也以癸巳閏七月八日生月日後於余呼余為兄盛甫間謂余曰兄既誌吾祖

考泉叔父矣堂兄之墓非兄又誰銘余不得以不文
辭曰盛甫狀略叙次如右系以銘曰
體羸而志剛美其質也阨窮而短季命之閔也聖人
所歎秀而不實也無子而有子庶其後之茂也

成均進士金君墓誌銘并序

遇卿之歿墓艸已六宿矣思之輒泫然者豈亶相好
之情為然哉顧以夫夫之美在裏叔更不易得也今
其弟履卿擬其言行為狀以示余要以幽堂之誌嗚
呼斯固余疇咎之所稔知也惡待乎狀蓋余與遇卿
有微舉聲子之好在童子雖未得共騎竹之遊余已

知金門之有遇卿而遇卿亦知吾家之有余也及稍
長邂逅於泮宮之庭即驩然如舊遇卿軀幹小而廣
頽踈眉目炯炯有光言動絕無鄙吝氣一見可知為
愷悌端直人也自是過從仍與其羣從周旋益得其
為人遇卿誠孝出天未成童喪怙能哀毀如成人及
長輒釀淚於蓼義詩事慈夫人有至行愛敬備至與
厦卿零丁相依雖友愛甚篤微見過失輒至誠警誡
遂兄弟間相為知己與人交樂易坦率不設畦畛然
未嘗妄相許與心所不善者將浼焉少嘗謂予急害
道取西門豹佩韋事扁其室曰韋齋痛自矯揉自是

居家遇物更無疾言遽色嘗入庭試寫卷將半有誤
瀉瓶水於卷上者傍人咸愕貽而遇卿不為之驚適
有持二紙者與其一而遇卿亦無喜語人之矯情多
在於從容閒暇而易失於紛擾忿遽之際若遇卿可
謂能克己者耶遇卿素不喜修飾邊幅而其操心處
己未嘗以幽暗少肆少嘗不利於陞補試隣有為國
子官者語之曰以君之才豈宜屢屈某日試君用某
字則吾可察之遇卿正色曰當俟丈人遷官後就試
矣其人慚服不已春塘臺庭試時 闕門外人馬駢
聞夜且黑多相騰踏雖達官亦不能下乘遇卿曰夜

雖暗天可欺乎輒下馬而過於此亦可見所存之一
二矣聰穎過人甫學語能知數百字嘗對棊棊林傾
子盡瀉地旋列置其子如故博觀羣書過目輒記為
公車治辭賦才思清麗能變陳腐語為新奇雖倉卒
構成亦必有警策可傳者就饗舍試每輒居首儕流
莫之敵先先輩長者亦皆交口稱服辛酉司馬覆試
所製館羅池賦尤奇警語極清楚悲切余嘗語之曰
使子厚有知必墮溺於此矣遇卿亦為之莞爾及掬
出果優等為賦之冠而有以詩居魁者遇卿名遂在
第三物論囂然稱屈文谷金公壽恒至以責考官曰

金京之不魁多士一何冤也仍出示其科製曰此可
居人下耶後於挽詩有凌雲詞賦壓儕儔每恨周庠
讓一頭之句蓋其慨惜之意久猶未已也世方馳逐
於名利縫衣之徒莫不以言議相高而遇卿常靜以
自守不事交遊雖其素性忼慨憂世傷時之意不以
韋布自已然或見儕友之持論峻激者則必引喻裁
抑務歸和平每與余論俗習之弊未嘗不歎咤也噫
世徒以遇卿為文士者固是淺之知者其謂之耿介
人者亦其一斑耳觀於其平居志行是豈易見於斯
世耶遇卿素清羸善病自壬戌歲感疾仍沈綿甲子

正月遭內艱遇卿方危綴哭擗之節不少殺見者無
不哀愍自此病益不可為矣猶朝夕自力點檢饋奠
不少懈至二月自知其不起謂其家人曰吾今病益
殤死矣未得終奉几筵我死後饋奠之事君必盡誠
視我在時且能與吾弟終始間嬰死無恨矣又曰祭
器宜常措卓上而舊卓垢污君亟親審淨之是啓手
前二日也其孝友之誠至死不已如此遇卿惟耽文
史無他嗜好凡於一物貨利之事泊如也及卒書籍
之外家無長物聞其卒知不知莫不嗟惜焉遇卿諱
聖臣慶州金氏新羅敬順王後裔也有諱相策本

朝開國勲封雞林君謚齊肅其孫曰從舜判漢城府
尹判尹有孫曰千齡直提學直學之子曰萬鈞大司
憲生諱命元 宣廟朝中興名相策勲封慶林府院
君謚忠翼是為遇卿高祖曾祖諱守廉官僉知中樞
府事 贈領議政祖諱南重官禮曹判書罷封慶川
君考諱一振成均生貧早世未顯妣豐壤趙氏成均
進士 贈左承旨來陽之女左議政文孝公翼之孫
也君娶羅州林氏父曰宏儒青巖察訪祖曰墀吏曹
判書舉三男三女長男象行娶應教沈濡女次德成
及二女俱蚤亡次曰趾衍遇卿以 孝宗五年甲午

十一月十五日生以今 上十季甲子二月三日卒
得季僅三十一以其季三月乙酉葬于高陽治西大
慈里負壬原從先兆也孺人後遇鄉五季而歿祔其
左銘曰

良玉之皎潔而不得為瑚為璉登諸清廟胡然而缺
也崇蘭之郁烈而不得為佩為纓薦之宗國胡然而
闕也才與命不相謀古今所恒我又將焉詰大慈之
岡背陰面陽茲惟遇鄉之堂百世在下視我銘章

墓碣銘

贈資憲大夫戶曹判書韓原君李公墓碣銘并序

仁祖大王 龍飛之翌年甲子大盜稀突 乘輿南

狩中外崩潰人心失其本就時有一丈夫陷賊賊脅

降奮罵不屈而死姓李諱穆字明遠韓山人也嗚呼

烈哉韓山之李稼牧兩公大顯於勝國未入我朝

有諱種善官判書

贈領議政謚良景即牧隱之胤

而公其後也奕世榮顯蟬嫣不替曾祖諱興峻同中

樞韓陽君

贈左贊成祖諱洽掌令

贈左贊成鵞

興君考諱義培策靖

社勲封韓川君

贈兵曹判

書妣璿源李氏濟州牧使京女以萬曆己亥六月十

七日生公魁梧拔凡少學書公習弓馬技藝絕倫魁

鮮額未及覆試有李适之亂公內舅李完豐曙為京畿監司帥師禦賊于松京以公自隨軍左次完豐授公狀俾達於行朝适已陷據京城公欲偵其虛實曉從昭德門入城為賊黨所覺執致於适适欲降之臨之以兵曰告爾舅所在則生否則死公不答适怒以鐵棍擊公膝脛每一下棍輒一脅之公瞋目大罵脛且折聲氣益厲以至於殞寔天啓甲子二月十日也事聞上為之嗟悼贈軍器寺判官韓川公時在明川任所許其解歸營葬亦異數也以是年某月日寔于揚州大灘村負某原配延安金氏縣監希溫女

有懿德至行自公歿不啜肉汁三十餘季以癸丑正月十日卒壽七十祔葬於公上下其墳而同塋焉有一男汝發歷官訓練大將知中樞罷韓興君推恩累贈公為資憲大夫戶曹判書兼知義禁府事五衛都摠府都摠管韓原君金氏封貞夫人韓興初娶大司諫李衿女生一女適縣監鄭行萬再娶學生李公亮女生四男二女長男基夏今為兵曹參判兼總御營兵罷韓城君次基漢參奉次壽千基明女適進士徐宗震掌令梁聖揆側出男女曰基亨基華基仁基燬具泰柱妻鄭寧妻金熙敬妻內外曾孫累十餘

人韓城以公墓道文闕見托於泰淳噫公之歿也鶴
谷洪相國以詩誄之凡二百七十言公之始終備焉
今不敢復贅蓋當甲子之變公非有保障之任官守
之責直行間一男子也不懾於席穴不變於白刃所
徇者義分耳志士仁人殺身而成仁者非公之謂乎
公歿後十四年韓川君又徇節於雙嶺之後公之若
子若孫世世干城為國帟臣公之忠烈蓋有所自而
垂諸後昆受天之報施者斯可驗矣銘曰
赳赳李公百夫之特少恥雕篆乃服武略丁時內訌
逆將稱兵大孤雄劍爰方從征潛行偵賊獨穿賊藪

時之不利不免席口罵賊如狗意氣彌烈吾脛可斷
我志難奪命輕義重身殞名飛凶徒折縮至尊傷
悲鬱彼楊山有封若斧我詩孔陽觀者髮豎

墓表

曾祖考 贈嘉善大夫吏曹叅判兼同知義禁
府事行通訓大夫司僕寺正兼 內乘府君墓
表

公諱東彥字仁起源出潘南姓朴氏弈世輝光名德
茂考諱應順 穆陵舅祖司諫紹謚文康曾祖龜年
天官郎妣府夫人 宗國姓父諱壽甲文川正癸丑

以降嘉靖季日永星火新月弦容儀溫雅性恬靜克
敬庭訓孝慈行戚聯王國弥謹勅戒深獎習斷私
謁右壤分蹕負羈勒望不識面涕坤極戊子生負通
仕籍佩鳳郡符長太僕家乘散逸歲緬邇事實歷職
失傳錄春秋知命過三季秋孟初九館舍捐夫人鄭
氏寔婉德考承宣淹光山籍後公再暮戊辰卒暮春
廿三載誕日忌辰首夏二十七從弟子潢胤後嗣位
至大憲嫡男四長曰世相廣興守次社稷令曰世柱
世桓第三世楠季側室一男世校是長房泰辰及泰
春其次泰淳次泰琮一女于歸韓配義辰登進士叅

奉止淳忝文科觀察使泰春出繼二房祀泰延泰進
三房男延筮蔭仕為縣監泰遜文科官吏議金昌集
妻四房子進士泰膺泰憑泉李基芳妻側出派公嫡
一女吳翊婚尹元之妻又厥女公庶一女李溟妾金
光蚪妻乃自出內玄外曾與雲仍百有餘多記不勝
潘城墓前抱乙崑右考左妣雙若堂采集顏筋勒諸
碣曾孫泰淳詩用述公沒後九十七年歲在辛巳月
日建

先考 贈嘉善大夫吏曹叅判兼同知義禁府
事五衛都摠府副摠管行通訓大夫廣興倉守

府君墓表陰記

府君生於萬曆乙卯七月二日卒於己未十月二十三日春秋六十五爽揚州金谷甲坐原始仕內侍教官陞宗簿主簿歷鎮安縣監金城縣令尚衣主簿漢城判官任實縣監左水運判官瑞山郡守廣興主簿社稷令廣興守繕工僉正金浦郡守後因不肖推恩贈亞卿府君居家寡言笑任真不款曲少嗜好惟文史自娛尤喜綱目老不釋手間則語諸兒以國朝事實先輩行義反復不倦居官如居家絕意干譽不喜動作至屬于民害于功者毅然不撓於威勢在

任瑞兩邑輒投劾罷歸不肖愚無知祇見其居家居
官如此爾先祖考懦軒公金清陰諸公拘於瀋也龍
首管其事輕重在心府君訪得其相死者孚以信義
俾求解於酋酋欲獨為之地府君以大人意辭曰同
拘獨免義所不忍尋得並脫當其時諸名勝多在瀋
頗有聞其事者始莫不疑之以握蛇料席也及是皆
驚孝宗大王方在質舉酒屬之曰不意君乃能爾
懦軒公亦亟稱賢智人謂父子知己不肖愚無知得
乎諸父長老如此爾少所友後多貴顯自以困滯罕
復造請久堂朴公長遠歎曰以君氣度乃爾寂寥耶

六谷徐公必遠謂人曰惜也京偉然足稱國家器
用族父文純公世采亦稱沉塞大度識慮出人不肖
愚無知竊見諸公推許如此爾諱世相字仲五潘南
朴氏文正公諱尚衷十代孫曾祖潘城府院君靖懿
公諱應順生諱東彥司僕正懦軒公諱潢大司憲本
以正公從弟觀察使諱東說之子為之後妣南陽洪
氏文靖公諱瑞鳳女也配貞夫人礪山宋氏都承旨
諱時吉女事無大小不怠不忽言無輕重必詳必審
懦軒公多媵侍夫人周旋無間言府君雅不以財業
關心夫人能經紀無乏愛諸兒勤摯而教戒嚴不少

饒興府君同歲十月廿二日生以庚辰九月九日卒
享年八十六與府君異壙而左附男長泰辰叅奉次
泰春出後仲父次泰淳觀察使李泰琬女教官韓配
義曰弼義弼咸弼或伯氏出生負權益寬妻仲氏出
繼子弼休生負宋咸明李度妻不肖出弼咸繼李氏
進士韓師範李弘佐柳時栢妻教官出弼義女柳緹
兩男多弼休兩男多於戲發揮先德既非旌昧所可
能者况質而無華府君雅尚也今不敢違負以重不
孝畧聞覩所詳識于碑陰以俟後之尚論第三男泰
淳泣血記內外面並集唐魯公顏真卿書今上二

十九年歲舍癸未月日建

嘉義大夫兵曹叅判李公墓表

公諱世選字選甫李氏系全義曾祖諱從訓都摠府
都事祖諱真卿節度使考諱枝馨統制使妣羅州丁
氏叅奉彥瓚之女公以崇禎戊辰生三十登武科三
十六陞堂上五十三陞嘉善七十以子閫帥例加嘉
義七十一考終于第奕于揚州東面文翰山西麓孟
洞丑坐未向之原先兆之次也公以名門重望歷踐
外內率由榮選六主藩閫而終統制摠戎邦畿而至
御營大將特進於經筵而兼帶摠管左右於京尹

而兵叅 特命也娶長水黃氏奉事大鳴女甚有令
德後公二歲生先公九季卒合葬于公墓左舉二男
三女男長昌肇統制使統制公家三世青氊也次光
肇生負女生負尹寬鄭五常尹濯側出夏肇折衝次
文肇昌肇有子女八男義泰義漸義晉義復義豐女
邊翼禧徐命勗申思任光肇有子女四男義白女金
始炯餘多尹寬女柳亨基鄭五常男揆尹濯有子女
三男得裁餘多內外孫曾三十餘人公豐貌偉幹宇
量寬洪恂恂然長者人也所在輒以清慎仁厚得衆
心友愛敦睦出於天性弟妹窮乏猶已飢寒䟽屬之


無告仰哺者甚多既沒家無餘財公之在朝上注意甚重嘗賜以劔帶病告遣醫視之頻饋珍劑內饌計聞臨朝歎曰某可用人也何遽至此命別致賻物此可見君臣之際矣公之平生固多可書而嘗於水營有咎在前帥而誤責公者罪至編配公受而不辨噫世固有利害不啻若毫芒而爭計較不已者聞公風宜可自失矣此一事亦足以見遠且大也尚論者當自知之

墓碑

亡室 贈貞夫人沈氏墓碑

沈夫人青松籍望我東為大族曰德符青城伯子諱
溫位相國世貴顯耀簡策曾祖忻珥史筆祖廷和龍
君爵父縣監其諱拭平澤林乃自出外翁嵎家於食
馬在歲猴建月載寢地日四六二八過歸于朴曰泰
淳初居室質何柔行焉絜內斯辯守若拙孝能敬尊
章樂泉僕御咸有則念又二奇疾作春屬季九除北
藥無靈神不福忽以遠終短折宋成明女所適生三
男選太學淳立朝官按察榮 贈貞二品秩維揚州
先丘側甲之原亦幽宅百代悠行同穴詩勒石倘陵
谷潘南朴泰淳撰 集唐顏真卿書

東溪集卷之十終





東溪集
卷五

詩

北



溪東

五